

Sebija Izetbegović
Zastupnica u Skupštini Kantona Sarajevo

Bosna i Hercegovina
Federacija Bosne i Hercegovine
Kanton Sarajevo
Skupština Kantona Sarajevo

n/r Kolegija Skupštine Kantona Sarajevo

Uputiti: Ministarstvu zdravstva Kantona Sarajevo, Uredu za borbu protiv korupcije i upravljanje kvalitetom Kantona Sarajevo, Upravi za inspekcijske poslove Kantona Sarajevo

PREDMET: INICIJATIVA

Poštovani,

Na osnovu člana 213. Poslovnika Skupštine Kantona Sarajevo, upućujem inicijativu Ministarstvu zdravstva Kantona Sarajevo, Uredu za borbu protiv korupcije i upravljanje kvalitetom Kantona Sarajevo i Upravi za inspekcijske poslove Kantona Sarajevo da se hitno provede nadzor, utvrdi ispravnost i zakonitost uspostave i korištenja sistema evidencije radnog vremena zaposlenika na Kliničkom Centru Univerziteta Sarajevo (KCUS), te da se provjeri da li se navedeni sistem primjenjuje u skladu sa važećim zakonima i podzakonskim propisima.

Naime, evidencija radnog vremena predstavlja zakonsku obavezu poslodavca i temelj za ostvarivanje osnovnih radno-pravnih prava zaposlenika, uključujući obračun plaće, prekovremenog rada, bolovanja i drugih prava iz radnog odnosa. Istovremeno, sistemi elektronskog ili biometrijskog evidentiranja prisutnosti podrazumijevaju obradu ličnih podataka zaposlenika, zbog čega njihova primjena mora biti jasno, transparentno i striktno usklađena sa propisima.

S tim u vezi, neophodno je utvrditi da li je sistem evidencije radnog vremena na KCUS uspostavljen i koristi se u skladu sa odredbama Zakona o radu Federacije Bosne i Hercegovine, kojima je propisana obaveza pravilnog vođenja evidencija o radnicima i radnom vremenu, kao i u skladu sa Pravilnikom o evidenciji o radnicima Kantona Sarajevo koji detaljno propisuje način, sadržaj, vođenje i čuvanje tih evidencija.

Također, imajući u vidu da se prilikom evidentiranja radnog vremena vrši obrada ličnih podataka zaposlenika, a potencijalno i korištenje tehničkih sistema nadzora (kartični, elektronski ili biometrijski sistemi), neophodno je provjeriti da li je navedena praksa usklađena i sa Zakonom o zaštiti ličnih podataka Bosne i Hercegovine, posebno u dijelu koji se odnosi na zakonitost obrade podataka, svrhu obrade, proporcionalnost, sigurnost pohrane, rokove čuvanja, te informisanost i prava zaposlenika.

Slijedom navedenog, predlažem i zahtijevam da nadležne institucije:

- izvrše vanredni inspekcijski nadzor nad sistemom evidencije radnog vremena na KCUS,
- utvrde da li se evidencije vode u skladu sa Zakonom o radu i Pravilnikom o evidenciji o radnicima,

- provjere da li se obrada ličnih podataka zaposlenika vrši zakonito i u skladu sa Zakonom o zaštiti ličnih podataka,
- utvrde da li su radnici adekvatno informisani o načinu prikupljanja i korištenja njihovih podataka,
- te, u slučaju utvrđenih nepravilnosti, nalože mjere za njihovo hitno otklanjanje i utvrđivanje odgovornosti.

S obzirom da se radi o zdravstvenoj ustanovi od javnog značaja, koja zapošljava veliki broj radnika i raspolaže osjetljivim podacima, smatram da je zakonito i transparentno vođenje evidencija od posebnog javnog interesa, te je potrebno hitno postupanje nadležnih organa.

Molim da me o poduzetim aktivnostima i rezultatima nadzora blagovremeno obavijestite.

S poštovanjem,

Sebija Izetbegović, zastupnica u Skupštini Kantona Sarajevo

